



廣東通志

ル 5  
1508  
11

~~門ル 6  
第 1508  
巻 11~~

持

門ル 5  
第 1508  
巻 11

廣東通志卷之二十三

郡縣志十

廣州府

人物一

盈天地間皆物也人則為萬物之靈超于物而亦  
不離于物者也兼而體之故曰人物其為聖為賢  
為豪傑不同而為人物同也猶飛走之有麟鳳蛟  
龍生植之有榿柟杞梓也麟鳳榿柟非世之所常  
出聖賢豪傑亦非世之所常有人物豈易易言哉

吾廣逖在粵南扶輿秀發嶺海炳靈鍾爲賢豪彙多名世高固相楚則五羊啣穗劉瞻相唐則三山發祥天人相爲感召其機有非偶然者宋則馮章靖以禮樂事君郭納言以方直致主白麻不起千載一人則有崔清獻慷慨立朝劬禦侮則有李忠簡是皆雲山鬱水之所毓靈誠吾粵百代殊絕人物也我 明治化淪濡間氣挺出一時英賢非他郡可得比埒茲特遴其最賢者著于篇作廣州人物志

**周高固**南海人周顯王時楚子熊商滅越蕪有南服是爲楚威王固以才能歸楚爲威王相時鐸椒爲威王傳以王不能盡觀春秋采取成敗凡四十章爲鐸氏微由固進之以故文教日興五羊啣穀萃於楚庭南海人爲畫圖以表著固功

**漢鄭嚴**田甲皆南海人武帝欲伐南越二人者首以越人歸漢帝令越人善射馳馬者選爲越騎使二人將之並封歸義侯號其士卒爲越侯兵元鼎五年秋蛙與蝦蟆群齧占者謂南方兵兆會呂嘉作亂遂命

四將軍帥師十萬征南越嚴爲戈船將軍出零陵下  
灘水甲爲下瀨將軍下蒼梧嚴善將兵而甲苛急衆  
未得前於是伏波將軍路博德樓船將軍楊僕巴平  
南越開九郡會東粵亦反詔嚴與甲即以越侯兵出  
若邪白沙討之元封元年冬東越平二人不加封惟  
免前稽罪云

何遺南海人元光中歸漢牂牁江東通交趾武帝使  
居犍爲郡伐呂嘉時受詔別將巴蜀罪人發夜即兵  
下牂牁江會番禺因犍爲發南夷兵爲且蘭之首隔

其道故兵未下南越已平上便令遺征西南夷會中  
即將郭昌衛賈誅且蘭平之亦以前稽不加封

畢取番禺人少以材勇事南粵王爲即呂嘉弑王殺  
漢使終軍立建德以叛漢命樓船將軍楊僕伏波將  
軍路博德伐南粵攻番禺西南焚掠南粵王命取將  
兵力戰互有勝負會日昃伏波將軍潛兵入營招諭  
衆將不肆屠殺取乃以軍降建德與嘉比夜皆遁于  
海上伏波司馬蘇弘得建德粵即孫都得嘉止封侯  
封取曠侯同邑先取封侯者張買則以父戍功云

鄧宏番禺人有謀畧權勇武帝元狩末交趾部刺史  
羅弘舉宏茂才爲屬國都尉以才能著轉南海郡丞  
有聲歷日南太守善於柔遠民夷懷之卒塋馬鞍山  
後建武中馬援南征交趾駐兵南海開拓土宇至此  
風雨晦暝聞人馬聲跡之得宏墓

吳霸字子公陽山人少以材勇爲兵校鎮中宿滬浦  
關嘗禦侮至涇陽招徠流徙民感其仁呼所駐山曰  
吳山後徙廣鬱都尉威震夜郎遷牂牁太守爲夜郎  
王立後天子從其請由是蠻裔畢服昭帝元鳳五年

秋罷象郡分屬鬱林牂牁霸族在桂陽者欲往廣鬱  
就腴田霸不許惟令墾近土廬居番禺西民服其不  
私今吳氏布護嶺表多其後云

楊孚字孝元南海人建初中舉賢良對策上第拜議  
郎和帝即位欲伐匈奴孚奏言創造用武守業尚文  
故周勝殷則有載戢干戈之頌太宗息兵嘗言自勝  
衣冠念不及兵先帝繼述虜來則應未嘗先伐故孝  
章之謚追配孝文詩曰允文文王克開厥後願陛下  
繩美祖宗毋輕用武永元十二年荒旱令在廷臣議

政令得失乎曰漢制郡國之士誦肄孝經察其志行選舉孝廉故帝謚必稱孝者躬行化率也王莽不服母喪天下誅之然今時公卿大夫懼父母憂不得去位而黎萌孝悌力田反得爵級非所以爲民表儀也宜詔中外臣民均行三年通喪而吏治必務廉平以勸選舉之士帝從其議詔禁有司假勢行邪其有巧法析律飾文增辭貨行於言罪成乎手事發重罪之賜三老孝悌力田爵三級爲父後者爵二級窮民不能自存者予粟時南海屬交趾部刺史夏則巡行諸

郡冬則還天府表奏舉刺不法其後競事珍獻乎乃枚舉物性霸悟指爲異品或爲韻語使士民識之乎著南裔異物志後爲臨海太守復著臨海水土記亦以正獻貢也

招猛南海人舉茂才爲郎元初中官至大鴻臚卿掌諸侯及四方歸義蠻夷與郡國上計儀皆屬焉猛善於其職動無違禮四夷重譯若高句麗馬韓玄菟南夷諸國初附及就封入覲者凡至容臺肄儀行事猛舉制詔眎之衆情悉慝云

陳臨字子然世家南海奮志絕俗郡舉孝廉永建中官至蒼梧太守推誠而理道人以孝懷民有遺腹子爲其父報怨殺人者在繫臨知其無嗣令其妻侍獄中後產一男郡人歌曰蒼梧府君恩廣大能令死囚有後代德叅古賢天報施建安中被徵爲廷尉後本郡以五月五日祠臨東城門上令小童潔服舞之其後子孫蕃盛世謂爲陰德所報

唐珍字惠伯連州人自幼時聞人讀書卽能記誦人謂神童及長貌狀瓌特善事父母天性好漠寡欲荆州刺史度尚甚稱重之及就辟召累官太常熹平二年秋代楊賜爲司空嘗奏請沿海立堠戍以防夷寇其先世家本潁川大父南徙至珍居三世時同族有中常侍衡與左棺等竊弄威福衡常呼珍爲弟珍恥之遂陽瘖不復出言明年冬以病罷歸居公位僅暮月素從榔人成武丁遊得黃老養性術閉戶獨處罕與人接光和二年卒鄉人屢見其出入山水間遂立廟祀之祈禳有應號唐司空廟其子孫多貴顯

踈源字元流南海人爲郡戶曹資性廉潔家貧餉晏



不至同舍卽餉先至呼之共食源輒力辭之後爲尚書卽習練故事爲九卿所重故人有詣源欲通苞苴者源絕不荅臨別便與訣曰子以言汙我從此與子絕矣居嘗拱手端坐人望之儼然暴直遇隆寒擁敗絮震掉戰慄吏獻裘堅却之從司徒上書言事忤權貴廢于家而卒

黃豪字子微南海人幼好學能通論語毛詩弱冠寓廣信教授門徒交趾部刺史舉茂才及徵至京師除外黃令約已儉節麤衣蔬食所得俸秩悉賜貧民比

所剖決一縣稱平是時鄰郡蝗蟲爲災而獨外黃無有歲屢豐稔民流移者悉歸附之闔境大治

三國黃蓋南海人孫權時舉茂才爲日南太守日南連年反叛頑不可治蓋思以法繩之自是稍知上下之分歛手遵法黃武四年冬魏主曹丕至廣陵臨江觀兵蓋從大將軍孫韶要擊之丕驚遁後改始安太守吏治有能理聲初魏人唐咨因亂兵推奉爲主避誅浮海來降孫權以咨爲將軍後討南海臨賀盜賊有功將帥多交接之蓋目爲叛人竟不相見其疾惡

顛此太元中卒

六朝王範南海人好讀書有鑒識州閭重之吳孫皓時閉戶不出或問其繇對曰見彈繳而弗避非靈禽也處亂世而求聞達非知士也人以為名言郭馬亂廣州逐刺史徐旗範從旗避難既歸以琴書自娛未嘗妄交有司贊其行薦辟之皆辭晉平吳後遵行九品官人之法每州置大小中正刺史熊睦薦州人德克才盛無踰範者舉秀才乃以範為廣州大中正選舉人才第其高下皆愜輿論時秘書丞河內司馬彪

號博學嘗著九州春秋盛行于時範閱之見其略於嶺服紀錄弗稱乃蒐羅自粵典故為書名曰交廣春秋泰康八年表上之訂述該覈眾見之稱服自是名動京師範為人卓犖不群篤學至老不廢交廣素缺脩載自範始創為之文獻賴以存焉

陶延字世賞其先家丹陽祖父基字叔先常為交州刺史始夷人不識禮義男女互相犇基至乃教以婚姻之道訓以父子之恩設庠序立學校闡境化之留從子居廣州生延延才兼文武晉元帝時以戰功至

伏波將軍爲陶侃卽將湘賊杜歿誘五溪蠻寇武昌延將兵夜趣巴陵掩其不備大破之當論功進秩會疾卒荆人還其喪于廣州

黃恭字義仲南海人自少恬漠履尚清潔刺史鄧岱一見卽器重之錄爲記室叅軍草檄聲罪山越壘服尋轉封山令居夷剖事甚有治材然非其好也州察孝廉舉爲佐著作卽父憂去職比服闋不起教授生徒發明聖籍鄉里推重徵辟不就乃補廣州大中正於是蒐緝王氏交廣春秋補其遺漏以君親倫理爲

重其論合浦尹牙者爲郡王簿受知太守問其愁悴荅以重讐未報卽變姓易名爲報之天子竒其才因赦不問此事邦君之大義也評者比諸刺客則謬矣丁茂孝感人謂之虛然則通于神明者非邪朱厓令女與母爭死不辱反爲鄙論所菲皆遠至道不應經義其他研覈皆此類也後復廣爲十三州記族子整爲平越司馬博洽工文詞有集十卷

楊平字伯衡南海人少好學篤義明習孫吳旁及鈐韜無不精曉以才畧爲郡從事歷盪寇校尉穆帝永

和五年拜交州刺史征西將軍桓溫遣督護滕駿率  
 交廣兵伐林邑王范文為文所敗平自將兵迎駿退  
 次九真更運粟治軍還攻之文被創死于佛代立七  
 年平與駿復進軍壽冷浦入頓即湖討佛佛連壘五  
 十餘里平與駿力戰大破之佛逃窟川殺遣其子太  
 師面縛請罪平遣武陳延勞佛子與盟而還林邑自  
 是貢獻不絕詔加平龍驤將軍封南陵縣侯

御魯字約子桂陽人

今屬連山

幼有至性甫四歲父思露

當遠戍呼魯曰五行矣歸無期也曾應聲泣拜訣別

如成人世以孝童稱之歲餘病死一夕甦夢人謂曰  
 上帝憐汝早孤特宥汝魯既愈日籲天願以身代父  
 死未幾計果至比殞哭踰度聞者傷之宋元徽中為  
 郡小吏適館閣遭火詔郡國悉上民間所藏書郡遣  
 魯獻之帝以其有功墜典賜之金帛會本郡太守缺  
 詔以魯補嘗遇異人能知來事在郡剖決如流修城  
 池梁道無虛日然經畫有方民不稱擾齊末明中卒  
 贈司徒民思其德廟祀之

區金字南貴南海人孝建末客揭陽齊武帝在潛

興師征豫章賊金爲首領從大將往平之至金陵事齊高帝及受禪用金爲右武衛校尉後以女爲美人累擢尹州刺史子穎亦以恩授寧州刺史穎子伯虎知勇積有軍功益折節讀書官至新州刺史撫綏民獠政得人和陳寶應遠留異爲亂伯虎從都督章昭達討之三世刺史亦嶺海盛事也

廖冲字清虛連州人博學能文辭復飾身脩行鄉閭稱之以儒術知名舉茂才仕梁爲本醜主簿西曹祭酒時武帝好儒學招徠天下名士冲與焉嘗賦詩稱

旨大見嘉賞湘東王就國聞冲工詞藻請爲常侍嘗許之王爲人猜忍浮華喜談老子冲嘗坐講進無欲自靜之說諷之王有過舉多所規諫遂日見踈帝旣耄荒諸子多不法大同三年冲謂所親曰根本撥矣天下能久治乎吾不去王將以赭衣衣我卽浩然挂冠歸結廬靜福山居焉託跡黃老以修煉爲名幽棲自適不復預世事人往訪之見其吟眺水石間猛虎修蛇馴狎其側休休如也陳大光二年卒壽九十七好事者相傳冲白日上昇號其地爲僊翁壇唐刺史

蔣防經所居爲作碑銘刻石山下稱其爲扶桑公陶  
隱居之流云

覃元先初名無名南海人勇力善騎射齊末反者四  
起元先召兵爲鄉邦衛據有番禺梁武帝受禪後慶  
州刺史李堅遣人說下之使歸梁任孝恭代堅爲書  
曰昔陸賈皇華定交知於南越長卿披繡通夷險於  
夜卽故傳美於往書流芳於篆素足下南方盛族嶺  
表豪門藉譽旣深流芳已舊但道曠風雲論平生而  
莫卽江山間阻銜杯酌以何因空想神魂徒勞憂寐

僕世稟威儀門勤鐘鼎提千海岳推轂數千逮我不  
才資蕪文武鴻私弗替應茲閩外麾蓋所臨寔宜慈  
造足下刺舉一隅同奉家國進止之宜寔俟高筭元  
先得書卽詣闕降高祖召見謂曰公當立勲業書彝  
常奈何無名乎遂改今名拜東寧州刺史在任累著  
戰功加雲麾將軍侯景反元先與賓化侯蕭雲討之  
擒斬賊將所向無前會元先卒雲遂遁歸

馮融番禺人

今新會

北燕主弘之裔弘爲魏所敗胤于

高麗使其子業將三百人浮海奔晉因留居番禺融

業之孫也世為羅州刺史至融能以禮義威信鎮于俗汲引文華士相與為詩歌蠻中化之蕉荔之墟絃誦日聞每行部所至蠻酋焚香具樂望雙旌而拜迎者相望輒戒其下曰馮都老來矣毋為不善以嬰罪戮都老猶言官長自是溪峒之間樂樵蘇而不罹鋒鏑者數十年初融之涖政也雖三世為守牧然他鄉羈旅號令不行乃為其子高梁太守寶婚于郡大姓沈氏俚人始相率受約束融既卒郡人思其德祀之隋初平陳嶺南推沈氏為主寶子陽春太守僕有拒歐陽紇

功見事紀

孫益自有傳

見高州志

族孫士翽隋岡州刺史入

唐累官至右武衛將軍

劉刪字正簡南海人少篤學有志操州郡舉為諮議侯景之亂侯官令徐伯陽浮海至廣州見所為文歎曰嶺左奇才也及伯陽為司空侯安都記室亟薦其詞學太建初召至京師除臨海王長史與記室張正見輩為文翰之友王深禮遇之後卒于官

區澤字伯仁連州人少以學行重鄉閭州近荆衡多流徙者澤招集至門擇智勇者予之貲使得經商因

編爲什伍鄉閭籍以捍衛隋大業中改州爲熹平郡  
拜澤爲郡守帝荒遊駐輦江都盜賊蜂起大江以南  
日夕俶擾澤練集驍壯以遏要路且耕且守蠻寇不  
敢犯時鄧文進保有廣韶二州澤惟以生殖休息爲  
務絕不與通會唐高祖代隋澤舉郡歸附荆粵得免  
於兵戈澤之功也天下甫定澤閉戶謝事不受唐官  
爵士論高之時區世界亦同歸附授本州刺史

**唐敬元禮**番禺人以薦官吉州叅軍武氏之亂李福  
業嘗與桓彥範謀興復唐室會武三思竊魁柄彥範

等被殺福業亦流廣州元禮見而敬重之福業嘗賦  
守歲詩有冬去更籌盡春隨斗柄迴寒暄一夜隔容  
鬢兩年催之句元禮以爲訝已而三思遣吏捕之亡  
匿元禮家吏捕得俱坐死福業將刑謝元禮元禮曰  
公窮而歸我我舍公奚忍乎見者歎服其義

**韓澄**字伯源南海人曾祖瑗顯慶中爲宰相高宗廢  
王皇后立武昭儀瑗力諫帝大怒褚遂良復諫被貶  
瑗救之許敬宗李義府誣瑗不軌貶海南卒尋籍其  
家子孫配廣州澄生長南海厲志讀書嘗默禱于羅



浮山神祈復世讎義府死後始以秀才得薦官至汲郡太守郭英又作變澄有軍功自普州刺史進尚書兵部郎中嘗巡歷至義府墓私發其尸鞭而刑之以報不共戴天之恨果符向所禱人皆義之從孫泰元和中官至漳州刺史韓愈刺袁州舉泰自代

蘇妙字觀妙其先本雍州武功父又爲京兆少尹徙南海妙幼竒穎讀書通大義累官至泉州刺史有惠政行春門樓有白雀來巢見妙出每飛集車蓋上泉民歌頌之先是又以父瓌兄頊世承台衮每懷盛滿名其二子長曰復取萬物並作觀其復也少曰妙取常無欲以觀其妙也妙兄弟皆好道奉事老子而儒行亦脩云五世孫紹之最知名

何昌期連州人幼健捷力制犇牛群兒畏之及長能挽二石弓以是知名天寶十四年安祿山叛詔郡邑徵武士昌期應募郡守試其能竒之遂隸元戎帳下時賊帥高秀崑來侵河北震動昌期時爲裨將與衆謀曰秀崑故哥舒翰將驍勇有謀陣一成難與爭鋒不如乘其未陣擊之乃先士卒大呼陷陣賊衆披靡

遂敗之秀崑退走時承平日久士氣弛靡祿山叛逆郡邑望風犇潰及昌期以勇敢倡諸將皆相謂曰南人孱劣猶爾吾曹可居其下乎競踴躍自效祿山之破自秀崑之敗始也有司上其功上甚嘉之累遷金牛衛上將軍封寧國伯昌期於兵書不甚讀然能仗忠義奮威武氣蓋三軍軍中目爲何十萬言其材勇足敵十萬云

李玉珪連州人少以義勇聞身長八尺五寸手垂過膝聲如洪鍾天寶之亂與何昌期同應募赴義後爲郭子儀部將子儀每愛其膽力嘗置左右平安史復兩京與有力焉摧鋒陷陣所向無前人服其勇比卒鄉人廟祀之

韋善道字守約南海人代爲郡著姓善道博學能詩而不好章句少作縣吏節度使張元章與語竒之乃免其役俾佐書記益究墳籍遂通三禮掌帥府威儀爲零陵令歲旱民有流移爲盜者開倉賑之境內遂安遷柳州太守有訟鵝者問其所飼甲云稻穀乙云糠飯叱而留之明日視遺矢有芒穀召甲歸之人服

其明兄弟訟田召終鮮者給之訟。感悟更爲輯睦。有八子長注遜跡不仕。闢園鑿池。朝喜之陽。曾玄累業不應辟舉。號韋隱。居家第七子滂。登進士第。上章歸養。善道沒后。乃出仕。官至象州刺史。

盧宗回字望淵。南海人。善學不倦。同舍生見其所作。嫉之。假以他事。毆宗回。宗回遜謝。恬不與校。由是爲鄉黨所重。舉元和十年進士官。終集賢校理。父之聞。父有疾。浩然乞予告歸。卒。宗回嘗寓長安。有題慈恩寺塔詩。時人玩誦。愛之。刻榜以傳。

南海人。系出區冶子。之後喜讀書。操持雅飭。家徙四壁。縹緗盈其間。挾卷呻唸。無少倦時。下筆爲辭。章千百言。滾滾不休。自郡守以下。皆重其文采。貞元十九年。監察御史韓愈。以直言貶陽山令。冊以道喪。學絕無所依歸。遂冒險往陽山。師愈。大加稱許。及冊歸省。覲爲文送之。其見重於愈如此。愈文章爲一代鉅工。冊因是知名。時又有區弘者。亦遊愈門。愈及張藉。有贈弘南歸詩。蓋愈遷法曹時。弘送至荆門。及愈入爲博士。弘復遠隨之云。

鄭愚番禺人家世殷富騶從悉紈衣鼎食愚幼穎力學嘗作詩云臺山初罷霧岐海正分流漁浦颺來笛鴻逵翼去舟隱然有濟川之志識者知其公輔噐云開成二年進士擢第釋褐秘書省校書郎累遷尚書郎咸通初爲桂管觀察使所至廉察吏弊闔境肅然三年嶺南西道節度使蔡京苛慘淫刑爲邕州軍士所逐詔以愚代之瘡痍敷敷方撫循不暇會南詔入寇安南都護蔡襲告急勅發荆湖卒二千桂管義兵三千詣邕州受愚節度而嶺南東道奏蠻兵決向

州宜先保護未可馳赴乃勅愚分兵守禦而所發諸道兵竟不進襲力請益兵愚支持半載邕州獲全朝廷反督責之愚乃自言儒生不能折衝請用武臣於是詔義武節度使康承訓代愚發荆襄洪鄂四道兵萬人與俱亟往救襲則已無及矣承訓上言愚在鎮善禦守狀朝廷始知其功徵拜禮部侍郎咸通八年知貢舉舊制詩賦多出古句爲題士蹈習成篇時詔放滇中子弟還國愚以比試之士多閣筆及於榜鄭洪業第一人及第輿論咸頌其公云黃巢平後廣州

殘破僖宗命愚出鎮南海以撫綏功召拜尚書左僕射三載卒無子詩文多散逸初愚之蒞桂也平章崔鉉在荆南愚以鉉負重口乃着錦半臂袖所爲文謁之鉉訝愚自爲進士未嘗以文章及門置不視惟留夜飲愚辭出更衣宿從疑其自慚不稱既而復易紅錦就席煥麗踰前衆莫能測鉉因愚出閱其所業歎賞不置曰真銷得錦半臂也愚鎮廣時常於越王山構亭作記今不傳

劉瞻者字幾之其先本彭城後徙桂陽父景卿坊從事瞻奇偉能文才思敏捷大中元年登進士第尋擢博學宏詞科歷太常博士執政劉瑑素重瞻薦爲翰林學士歷承旨出爲河東節度使咸通十一年以中書侍郎同中書門下平章事時同昌公主卒懿宗逮醫韓宗紹等下獄詔逮繫其族屬三百餘人諫官無敢言者瞻疏救帝不悅復與京兆尹溫璋等力爭之帝大怒即日賜罷以檢校刑部尚書同平章事爲荆南節度使路岩常保衡譖其通醫投毒俄斥廉州刺史翰林學士承旨鄭畋草制有曰安數畝之居仍非

已有却四方之賂惟畏人知巖怒謂畋曰君乃表薦劉相耳貶刺梧州御史中丞孫瑄諫議大夫高相等坐與瞻善皆貶嶺南巖等殊未慊按圖視驩州去長安萬里遂貶驩州司戶叅軍命李庾作詔詆之將加誅戮天下謂瞻鯁正被讒寃之幽州節度使張公素䟽斛巖等不敢害僖宗卽位徙刺康號二州召爲刑部尚書復以中書侍郎同平章事將還長安市人率錢顧百戲迎之瞻聞之改從他道入居相位三月卒人謂韋路之黨劉鄩者鳩之云瞻爲人廉介餽獻不及門所得俸以均親舊家不留儲入相後第舍無所增飾其清脩始終靡易云子延賞右拾遺

鄧承勳南海人績學膺薦上京從宰相劉瞻制誥父之登乾符五年進士爲處州司馬待選家居時節度使柳玘甚禮重之錄其家範以教子孫會黃巢破廣州執節度使李迢索玘甚急承勳潛以小舟濟玘告難長安後巢賊平承勳拜江州刺史謝病歸

何鼎其先曲江人後徙番禺少聰悟日記萬言大中初進士筮仕著作郎遷瀧州司馬以能名節度使李

台禮重之累遷容管經畧使時承亂後民生憔悴鼎  
 專意招徠賴以安堵峒賊梁宗煽叛鼎單車往說之  
 賊徒露刃林立鼎從容諭以禍福且曰汝曹何不兵  
 我宗與其徒皆拜泣曰聞使君高誼久矣今開示逆  
 順是生死而骨肉之也敢違命乎即率眾歸耕終鼎  
 任無胫篋者廉新二州歲大侵賑濟不足以俸周之  
 會鼎小疾民為燃指禱神鼎善星曆時朱全忠強逆  
 不臣鼎誠諸子曰汝慎毋事全忠全忠竟類祿山而  
 宣淫彌甚終有慶緒之禍以勢覘之全忠必將改王

揆之星象則唐當復興晉分野有王氣其在河東乎  
 鼎沒後友珪弒全忠莊宗戚友貞悉如所言諸子守  
 其訓皆事莊宗子澤最知名

**五代**何澤鼎之子少好學工詩舉進士為洛陽令唐  
 莊宗好獵數踐民田澤乃潛身伏草間俟莊宗至當  
 馬諫曰陛下未能一天下以休兵而暴斂疲民以給  
 軍食今田將熟柰何恣畋害稼使租賦何出乎陛下  
 不聽臣言願賜死馬前使後世知陛下之過莊宗大  
 笑為之止獵拜倉部郎中明宗時屢上書言事皆國

家大務復請置太子侍讀明宗下詔褒美是時儲宮  
久虛士論躓之明宗幸汴復欲幸鄴人情洶洶大臣  
屢言不聽澤伏閣切諫明宗嘉之拜吏部郎中史館  
脩撰五代之際民苦於從征多因親疾割股或旣喪  
而割乳廬墓規免賦役戶部歲給蠲符不可勝數而  
課州縣出紙號爲蠲紙澤上書言其弊明宗下詔悉  
廢戶部蠲紙民便之澤與宰相趙鳳有舊屢求爲給  
諫鳳不許乃以爲太常少卿勅未出而澤先知之即  
稱新職上章自訴章下中書鳳等言澤未拜命而稱  
新職輕侮朝廷請坐以法乃以爲太常少卿致仕居於  
河陽澤時年七十矣晉高祖立召爲太常少卿以疾  
卒于家

張鴻連州人天祐元年進士時唐祚式微鴻知勢不  
可爲遂隱不出天下聞而高之所爲詩清絕著述甚  
富有集十二卷行於世同羣邵安石黃匪躬吳霽並  
有才名與鴻相頡頏然皆以唐進士事朱全忠爲士  
論所少視鴻高飛冥冥蓋霄壤矣

陳拙字用拙以字顯連州人少習禮樂尤長於詩唐



天祐元年擢進士第授著作郎見朱溫弒逆遂假使節南歸加清海軍節度使劉隱同平章事隱留用之未幾溫篡位改元開平用拙勸隱仍奉天祐年號隱多其義而不能用遂掌書記攝觀察推官比隱病篤用拙撰表請其弟節度副使巖權知留後隱卒巖襲位益信任之乾化四年奉使吳越吳越王錢璆與語嘉其專對賚以金帛用拙遜謝歸以獻巖巖稱南漢擢爲吏部郎中知制誥卒有詩集八卷行于世尤精音律著大唐正聲琴籍十卷戴琴家論操名及古帝王名士善琴者古調無徵音仍補新徵音譜

黃損字益之連州人少慷慨有大志棲隱靜福山罕與俗接以績學聞本工詩賦遇佳山水留題殆遍自謂所學未廣乃遊洞庭諸名勝結交天下士都官負外郎鄭谷爲湖海騷人所宗一見亟稱之與定近體詩格又嘗著書二篇顛陰符鬼谷論修治之術具有宏識議者每期以公輔器爲有司所薦登梁龍德二年進士第歸自京師適廣州與梁絕乃仕南漢王夔國事多諮之遂見親任累選尚書左僕射取湖南諸

州皆其策也會龔建南薰殿雕沉香爲龍柱務極工  
巧少不如意輒誅工匠前後十餘人損極諫致忤會  
宰相缺群臣多推損龔謂左右曰我殊不喜此老狂  
久之病卒所譏有桂香集行于世損博學多能輕利  
重義指背築高良之邪陂灌田甚廣鄉邦賴之在匡  
廬日與桑惟翰宋齊丘相友善每論天下事二人自  
以爲不及一日遊五老峰同憇盤石上有老叟長嘯  
而至謂惟翰曰子當位宰相然而狡狡則不得其死  
謂齊丘曰亦至宰相然而忍忍則不得其死獨異損

曰子有道氣然才大位晦不過一州從事耳損曰有  
才何患無位下僚曾足稽損耶叟咲曰非所知也其  
後維翰相晉齊丘相南唐皆見殺損在南漢雖位僕  
射祿視州從事世謂前定云

簡文會南海人幼穎異工詩性耿直南漢王龔開進  
士科擢第一人及第累官尚書右丞及事劉晟諫其  
暴酷晟怒謫禎州刺史盡心民事卒于官所居里有  
簡狀元井後倫文叙居其地亦狀元及第云

石文德連州人少博學一覽不忘讀范曄漢書摘其

唐史通志 卷之三十三 二十四 三百五十三  
瑕璽數百條辨駁之識者謂公羊墨守不能過也素  
不善草隸詩律得晉帖數紙及閱殷璠詩選極力模  
倣久之迥出儔輩傲遊湘漢間無所知名僦屋長沙  
遇天策府學士桂陽劉昭禹與語大見稱許值端午  
宴集又德賦艾虎長篇昭禹驚曰君文苑之雄也言  
諸楚王馬希範得隸詞學秦夫人卒王命文士爲挽  
歌文德詩有云月沉湘浦冷花謝漢宮秋王嘆賞品  
爲第一授水部員外郎甚親重之名其鄉爲儒林會  
燕長春堂希範出玉杯賞賦詩者李臯詞先成得之

文德繼進更美王復資以玉蟾滴由是諸學士多嫉  
其能尋出爲融州副使蓋以譖也希範性太侈營建  
征討無虛日徵諸州榷枿皮鎧動至數千文德切諫  
觸怒昭禹力救之乃免亡何卒文德性剛介不苟合  
故見忌于時所著有唐朝新纂傳于世

鍾允章其先邕州人徙家番禺博學能文辭南漢劉  
龔之掇廣也設科取士允章以進士及第累遷至中  
書舍人允見知於晟晟喜其文思敏捷誥勅碑記多  
命爲之操筆立就文藻燁然由是聲名籍籍遊羅浮

應制爲詩多見褒賞每以倚馬才稱之拜工部郎中知制誥乾和六年使楚求婚楚不許允章還晟曰馬公復能經畧南土乎是時馬希廣新立希萼起兵武陵湖南大亂允章具言楚可攻狀晟遣巨象指揮使吳珣帥師伐之克賀桂連宜嚴梧蒙七州晟以允章首議賞賚不可勝紀有司奏允章名儒宜傳儲貳晟命教長子鋹晟卒鋹即位以藩府舊僚頗敬重之擢尚書左丞叅知政事時鋹淫戲無度委政宦寺陳延壽龔澄樞等女巫樊胡子宮婢盧瓊仙朋妖亂政允

章深嫉之抗疏請誅亂法者以肅國紀鋹不能從群小皆側目大寶二年鋹祀天南郊前三日允章與禮官登壇四顧指麾宦者許彥真望見之曰此謀反耳乃拔劍升壇允章迎叱之彥真馳告允章反鋹下允章獄族誅之是日天色慘澹國人以允章素忠鯁皆爲掩涕彥真誅後始收塋焉允章弟有章亦以文學稱累官翰林學士中書舍人先卒

周克明字昭文南海人曾祖德扶唐司農卿祖傑開成中進士弘文館校書郎擢水部員外遷司農少卿

精於曆算嘗以大衍曆數有差因敷衍其法著極衍二十四篇以究天地之數時天下方亂傑以天文占之惟嶺南可以避地乃遣其弟鼎求爲封州錄事叅軍傑天復中亦棄官携家南適嶺表劉隱素聞其名每令占候天文災變傑自以年老嘗策名中朝耻以星曆事僭僞乃謝病不出龔龔位強起之令知司天監事因問國祚脩短傑以易筮之得比之復曰卦有二土土數生五成於十二五相比以歲言之當五百五十龔大喜賞賚甚厚龔以梁貞明三年僭號至開

寶四年國滅止五十五年蓋傑舉成數以避害爾大有中遷太常少卿卒年九十餘傑生茂元亦世其學事龔至司天少監歸宋授監丞而卒即克明之父也克明精於數術凡律曆天官五行讖緯及三式風雲龜筮之書靡不究其指要開寶中授司天六壬改臺主簿轉監丞五遷春官正克明頗脩詞藻喜藏書景德初嘗獻所著文十篇召試中書賜同進士出身三年有大星出氏西衆莫能辨或言國星妖星爲兵凶之兆克明時使嶺表及還亟請對言臣按天文錄

荆州占其星名曰周伯其色黃其光煌煌然所見之  
國大昌是德星也臣在塗聞中外之人頗惑其事願  
許文武稱慶以安天下心上嘉之即從其請拜太子  
洗馬殿中丞皆兼翰林天文又權判監事屬脩兩朝  
國史其天文律曆命克明叅之大中祥符九年坐本  
監釋口差互例降爲洗馬天禧元年夏火犯靈臺克  
明語所親曰去歲太白犯靈臺掌曆者悉被降譴上  
天垂象深可畏也今熒惑又犯之吾其不起乎八月  
疽發背卒年六十四克明久居司天之職惟務勤慎  
凡奏對必據經盡言及卒上頗悼惜遣內侍諭其孀  
直龍圖閣馮元令主喪事賜賻甚厚

**宋李廷珙**連州人父處顏博學善屬文明宗天成中  
從征淮甸累功爲武安節度幕府掌文翰處顏沒廷  
珙猶在襁褓寄食母家幼岐嶷不群其舅器之曰此  
千里駒也以勲闕除番禺簿時群雄割據劉氏擅廣  
左馬氏復聚集柳連廷珙懼禍出仕南漢爲土軍都  
知兵馬使時劉鋹爲不道屠戮忠良戕骨肉殆盡橫  
征暴斂民不聊生廷珙知其必亡乾德四年四月珙

遂欵塞效順太祖嘉其義詔授柳州指揮使檢校工部尚書兼御史大夫春州刺史廷珙感激明年獻策平南漢開寶三年詔潭州防禦使潘美克桂州都部署尹崇珂副之廷珙嚮導出師下賀州復下韶桂將東攻連山南漢將盧枝守騎田嶺嶺號咽喉地王師力攻敗績廷珙引大兵出春陵屯平陽去枝屯百餘里聞枝堅壘相拒請于美曰枝衆皆廷珙故部曲願輸忠义矣招之必下乃單騎招降之枝燒壘而遁廣州大震銀所遣諸將敗還宋軍連捷明年二月南漢平皆廷珙嚮導力也擢廣西總管招討使五管望風歸附詔廷珙入覲勞賜有加改所居里爲奉化累遷刑部尚書

周渭字得臣連州人幼孤長力學工詩時州隸長沙楚與南漢相持渭爲廣人俘獲妻子流離昭州遂爲恭城人劉鋹政煩賦重渭率鄉人避于零陵未至賊起斷道絕糧脫身北上建隆初至京師爲薛居正所知上書言時務召試賜同進士出身解褐白馬主簿縣吏犯法渭卽斬之上奇其才擢右贊善大夫時魏

帥符彥卿郊迎渭揖于馬上就館始與相見畧不降  
屈乾德中通判興州監軍傲很縱其下爲暴居人苦  
之渭馳往斬其軍校衆皆懾服詔書嘉獎命兼本砦  
鈐轄開寶元年鳳州奏房冶主吏盜隱官銀選渭往  
代周歲羨課數倍遷知棣州殿直傳廷翰爲監軍謀  
降契丹部下告變渭執以聞泰平興國二年爲廣南  
諸州轉運副使奏革南漢時繁稅遷殿中丞移書安  
南諭朝廷威信黎桓懼遣使入貢加監察御史居六  
年徙知揚州累遷職方員外郎益州轉運使坐從子

兖州四年改右諫議大夫知廣州州城瀕海番舶至  
岸常苦颶風擘鑿內濠通舟颶不能害夷人德之  
古成之字亞奭先惠州河源人五季末來籍增城性  
簡靜寡嗜欲嘗結廬羅浮力學不怠博覽群籍時吟  
咏以自適文譽殷殷動四方宋初嶺嶠文風未振每  
取士合路止一人衆推成之雍熙改元克秋賦督府  
爲之勸駕明年上春官擬奏籍第二臚唱而暗乃同  
籍陰害之略無憾焉人服其量端拱初再舉進士名  
次十九時同籍二十八人以上應列宿慎濫取也故



廣之舉進士自成之始初調真定府元氏尉改知青州益都俱以惠愛著咸淳三年除校書郎時爲張詠所器及李順亂蜀辟成之知綿之魏城先是內豎王繼恩討賊至縣居民避兵者多溺死積骸如疊予遺者皆瘡痍流徙成之既至勞來而煦育之米饑者藥病者所活數千人又立學校課農桑俗爲之一變成平五年蜀又有僦復以詠知益州詠以成之長於撫恤再辟知漢州縣竹一以理魏城者理之縣竹大治卒于官成之以文章爲南徼首倡尤工於詩雅意林

壑嘗爲麟州鸞谷之遊或謂成之仙去以其遇異人後立祠邑人吳廷講偕子文燦捐田五十畝祀之

吳世範連州人咸平進士大中祥符間爲漳浦令有善政署上考下詔褒美後由太子中舍遷殿中丞工于詩文今白鶴靜福二山留題尚存

馮元字道宗南海人高祖禧唐末官廣州傳三世至父邴爲保章正元初嗜學從孫奭授五經大義又友崔頤正逮寇博覽爲詞章鬱有思致不妄交游惟樂安孫質吳陸參譙夏侯圭相善號四友大中祥符元

年進士授江陰尉詔流內銓取明經者補學官元自薦通五經時諫議大夫謝泌領銓事笑曰古治一經或至皓首子尚少能盡通邪對曰達者一以貫之可矣轉直講由是名震京師遷大理評事擢崇文院檢討兼國子監直講王旦聞其名嘗令說論語老子群子弟侍聽以其淹粹亮恪深加禮重因薦之八年真宗試進士殿中召元講易元進說曰地天爲泰以天地之氣交也君道至尊臣道至卑惟上下相與則可以輔相天地裁成萬化要之一誠之感而已帝說賜五品服遷太子中允直龍圖閣詔預內朝直龍圖閣預內朝自此始數召講易於宣和門盡上下經帝稱元誦說通而不泥言外自有餘趣非專門一經士也俄改三品服天禧元年以諫議大夫假節使契丹還遷太常丞兼判禮院吏部南曹四年擢左正言兼太子右諭德數獻歌頌兩宮褒禮賜予甚渥仁宗即位改戶部員外郎爲直學士兼侍講與孫奭以經術並進師生同升人兩榮焉俄兼會靈觀副使知通進銀臺司天聖元年判登聞檢院明年同判國子監故事

國子監多宿儒典領及奭並命士議悅服三年改禮部郎中五年同知貢舉進龍圖閣學士預脩三朝正史十一月燎祭南郊爲鹵簿使七年爲翰林學士凡三禁職皆天下選而元兼有士林榮之又判尚書都省三班院改吏部郎中八年以國書成進諫議大夫克史館脩撰九年判吏部流內銓兼群牧明道元年十月享宗廟又爲鹵簿使遷給事中明年耕籍田使任如廟禮前此本定陵之葬命元監護其事帝親政追冊宸妃爲莊懿帝皇后改葬永定陵既發壙而流

泉沮洳言者以監護不職十月解翰林學士及侍講出知河陽辭謝見上但頓首引咎而已會太學官屬叩丞相府上書乞留元固願行到部以清靜稱不作條教王曾爲上言元東朝舊臣不宜以細故棄外上悟即日馳詔改禮部侍郎兼翰林侍講學士知審官院復判大常禮院國子監獻金華五箴上納其戒賜書褒答四月領脩樂書俄復爲南郊鹵簿使管祥源觀事書成賜名景祐廣樂記特遷戶部侍郎賞勞也四年春足疾氣愕屬其友李淑宋祁爲銘誌四月卒

年六十有三賜賻錢三十萬贈本部尚書謚章靖元性簡厚終日無戲言情色日與門生對坐誦說孝經尤精易七歲時讀經母夜夢異人以紺蓮花與元吞之且曰善讀此後必貴顯故元且老率三日一誦易改大樂鐘石以合于律後有建言其非者上遣中人就舍問之元即櫛班固律曆志唐書兩說付中人以對召見邇英閣上謂曰向考正大樂患其寢高而急今也下而緩二者不得其中失在律卿言是矣因出橫黍新尺示群臣比縱尺差二寸一分而弱以較衡

斗皆不讎微元言莫能正其謬嘗預注真宗集同脩鹵簿記校後漢志輯孟子及律義疏分撰國朝會要皆未成書家人攜其遺文得數百篇詩百餘章宋郊稱其清緻平萃類其為人無子以兄之子諱為後蔭授衛尉寺丞孫二人將作主簿宋郊作史以賈誼董仲舒擬元且曰命有屈於元元無不慊於道其知元乎

唐靜連州人父元雍熙進士官屯田員外郎靜生而穎異十歲能文隨父宦蜀遭母喪哀毀踰常間關歸

廣東通志 卷之三十三 三四 三五  
葬人稱其孝大中祥符八年再舉進士科歷韶州判  
官試大理評事執法不撓一時推重范仲淹龐籍輩  
咸兄事之靜子炎景祐元年進士官至太子贊善三  
世甲科連郡前此未有云

梁杞香山人性醇謹好學通五經慶曆六年登進士  
爲連州司理讞獄詳明部使者薦令桂陽蒞政以惠  
民爲本恤孤寡抑奸猾作陂池教種藝平賦後弭盜  
賊庶務悉舉虔商有擾市廛者設方略驅逐之邑以  
大治嘉祐中遷比部員外郎尋判鄂州借尚丞爲

置局醫斥去淫褻陋俗爲之一變熙寧初致仕與運  
判徐九思議立香山縣事不采行後紹興二十二年  
同邑陳天覺與東莞令姚孝資復奏請詔從之竟成  
其志天覺亦以文學知名中博學宏詞科議論切直  
見忌于時遂不復仕今二氏子孫並盛世以爲建議  
開邑便民之報云

林脩南海人輕財好施元祐初調官京師授寶鷄王  
簿手錄司馬溫公家範守爲家法脩之孫曰師仲曰  
遠皆好學循禮黃庭堅謫居涪州師仲往謁之庭堅

勉其教子曰人家有賓客動輒費數千乃不能捐百千奉其師友非善計也後師仲兄弟創義齋教子弟及諸生隆興初有登第者而遜遠居母喪一遵禮制胡銓作素冠說貽之今淨慧寺千佛塔脩所建云

劉富南海人仕試將作監主簿熙寧元年知廣州張田徙郡學于國慶寺東未及營而卒富納貲獻材戮力自効轉運使陳安道以爲卑狹而止之繼田任者程師孟將之竒發官資充成之富復以負郭之田總其直與費爲錢五十萬資于學懷化將軍辛押陀羅者蕃酋也聞風興起亦捐資相助且售田增之復置別舍以來蕃俗子弟之願學者鬻舍之成廩食之備富之功居多

丁璉字玉甫番禺人少有才名杜門讀書通五經問業者戶外屨常滿元豐二年登進士授融州司戶歲侵民聚爲盜璉立法賑濟邑境晏然監司上其功遷宣教郎尋拜大府丞兼知樞庫改朝議郎元祐六年夏人侵靈州廷議討之璉言于朝謂今日事勢當先北而後西西賊敢爾跋扈者效尤契丹耳倘蓄精銳

廣貯積足制契冊之命則西賊膽落矣當斯時以餘力討之未晚也宰執惡其言出爲桂州教授比至訓迪有方多所造就紹聖初以薦授左朝散郎知連州郡多水患璉沿地勢築隄防民蒙其利陽山銀礦流民多匿其中夜恣劫掠璉計擒之闔郡以寧元符三年轉朝散大夫致仕卒年七十三璉性廉介蒞政剛明博學若愚與物無忤邑里稱長者知廣州蔣之奇以才自負廣南士夫少許可嘗與璉泛舟觀九曜石劇談夜半驚曰君學精博中州士不如也每語人曰景有沉珠浦人有丁玉甬吾來嶺外最無聊獨恃此耳其見重如此

霍曄字明甫南海人篤志好學故從鎮南節度推官馬存游存以才名自負獨重曄曄爲文志于古不與俗合或勸易其習以質諸存存爲序勉之初景祐間新會龍山之水色變而爲紫者旬日人皆以爲端曄獨持論以謂清者水之真體也變而爲紫非正色也其必水之怪乎水陰物也陰之類爲小人爲夷狄爲盜賊奸宄今水失其常性吾恐其闡國家者大也及

蔡京童貫輩當國有金人之變江南盜賊蠭起其先見類此後入太學時詔舉八行人以晞之脩已教於家者無間言遂以應命官終海豐縣尉

王知東莞人少有學行元祐中詔舉八行游太學十五年舉進士以親老求歸初寧軒濟陰學士昭玘爲記述其懿行足範鄉閭隱居樂道未仕而卒廣之士一時以八行著者知與南海霍曄二人而已鄉評咸謂無愧云

黃洞字明達南海人性度玄曠博學能文自經史百家以至浮屠老子之書罔不究心舉于鄉教竒竟不得雋南省元祐初蔣之竒知廣州初下車即聞洞名遂與之相往還談今古罄底裏時或出筆札互倡酬之竒自以爲不及會妖人構亂洞爲之竒畫計先事平之之竒最其才能紹聖改元蘇軾以寧遠軍節度使安置惠州時往來南海洞又與遊焉嘗同軾登鑿空閣賦詩軾亟稱之比軾北還洞與吳復古何崇道李公弼林子中追餞至清遠峽而後返洞爲詩瑰竒時出新意爲人所傳誦然志大才踈故不究于用



張書言番禺之水西人今從化縣其先家世本山東祖士元仕至中憲大夫提刑廣南東路因留居焉父約以學究奏名書言少博學有令譽元符三年進士及第宣和初為廣東市舶提舉制驗收法蕃夷便之以憂去父之復至人皆愜望遷朝議大夫瓊管安撫大使所至皆有惠政兄書行官亦至朝列大夫兄弟蟬聯為一時衣冠之望云

黃勳字有功南海人幼有至性孝於父母母歿家貧無以為葬或議火之勳哭曰吾母何罪而惟焚烙之

酷乎乃為人傭書得錢以葬鄉黨異之咸嘖嘖曰黃氏有子如此必不久食貧矣紹興二年登進士第郡守季陵素重勳新其第宅名所居巷曰擢甲初授永福丞適縣令父病廢事勳為辨決獄囚滌滯除弊民貧不能具稅賦者勳為代還積逋八千三百餘緡民歡呼稱為再生父焉以監司薦銓授脩職即尋進秩右朝奉即知新昌縣有富民父訟析資不平召其族長諭使直之而訟以息人以為得體郭外五里許昏夜有殺人追所剽刃驗之則皆豕膏也值旱徧禱于

廣東通志 卷之二十三 三十一  
境內神祇多集屠者宰牲其中一人刃獨新一國卽  
伏人以爲神久之進朝散卽知雷州嘗築郡城甫成  
其半以贖能遷去雷人德之改知新州當時號循吏  
云終朝散大夫致仕卒勲爲人博洽而深沉最明經  
義凡聖賢格言皆躬自錄之遂積學成名嘗曰好義  
當如求官除欲當如祛病世以爲名言從弟熙亦登  
第歷韶州推官胡寅甚重其才

廖顥連州人父玖爲徐州教授紹興中知新州月得  
供給錢悉付公帑或訝其過玖曰吾惟一子業已登  
科厚積何爲哉顥生而慧九歲能屬文登紹興進士  
第歷縣令改封州教授時父方解政新州顥迎養及  
父卒持喪歸哀動行人起知化州柳寇李金圍城月  
餘滴水徑乘爲亂大帥陳輝命顥統諸將討之金見  
顥部伍嚴整懼而宵遁顥傳檄召徑酋諭以順逆徑  
人遂降輝上其功詔褒賞之改知英州招集流民盡  
剗宿弊有能名徙知循州歷廣南西路提刑先後多  
所建明其奏上供銀額之害科舉省試之法尤切中  
時弊云

孔元勳番禺人父粹熙寧中知封州有善政改知雷州兼直學士元勳少穎異長益惇厚居鄉慎言動雖田更野老不少忽紹興初領鄉薦中進士乙科授連州教授正身率物尋知封州嘗上機宜預防七事多見採納值廣寇嘯聚薄城邦人大恐元勳率僚屬嬰城自守募善射者連斃二酋餘黨奔潰朝廷褒賞擢朝散大夫知新州撫字益有聲未及大用而卒人皆惜之元勳能文章工詩清勁沉鬱類其爲人有集藏于家仲弟元凱亦有行誼有江右商人中途苦渴汲井飲之因釋裝憇樹下遺百金而去元凱見之持歸復往俟焉有頃商至四顧躑躅長號欲赴井元凱止之詢其實舉囊還商酬以半不受商感謝曰吾必報子比居父喪商至爲擇地窆焉迄今子孫蕃盛果符其言世以元勳父子兄弟皆賢故名所居鄉曰慕德里其後裔稽譜曲阜蓋出尚書幾之派幾曾爲嶺南節度使於宣聖爲三十八世孫云

吳群字無黨番禺人幼穎悟有遠器弱冠領鄉書登紹興壬戌進士三歷邑令所至有聲尋以負外郎判

瓊州時海盜竊發群捐俸立城堡禦之峒黎爲亂單  
騎往諭遂戢兵歸耕初同邑李諤建炎中登進士安  
撫瓊州築外羅城寇至無患群益加脩繕弭盜卹民  
政聲與諤埒瓊人金德之有賢令皆番禺之頌群尤  
廉慎一介不苟取終朝奉郎

吳純臣群之子居官有父風嘗知連州盡心民瘼嘉  
定乙亥春夏不雨純臣路行酷日中詣龍津之靈濟  
廟禱焉頃之神物蜿蜒出水上雨如注歲大獲郡民  
勒石頌德崔與之素知其賢比入覲上問南中人才

以純臣對有旨除提點廣西刑獄剖決無滯民有醉  
入仇家適其毋妲誣之獄成矣純臣釋其寃一境稱  
神時廣右帥臣鄒應龍以大魁典鎮有重名少許可  
獨才純臣嘗書清通仁厚四字贈之謂其平反明允  
不事鉤距云純臣平生口不言錢四握州麾儒素如  
昨進通奉大夫輒乞歸人稱其急流勇退卒年六十  
二長子雍兩詣漕辟官太守亦以能稱終朝奉大夫  
沿邊安撫使雍子莘蔭將仕郎史館檢閱

陳康延字元舉南海人力學自奮紹興庚辰登進士

第初調潭津勾警再調龍川錄事三任學官兩歷邑令淳熙間適康延改秩入京朝廷議催二廣鹽丞相梁克家與康延厚召赴都堂令分司蒼梧領之事成處以監司康延力辭曰二廣民力竭矣催之則民重困敢藉此圖峻秩乎克家知不可奪愈器重之議旋寢擢知梅州至郡訪民利病知境內有贛商之擾於是嚴保伍法禁與贛商私販復於衝途設寨募士兵雜居置隅總爲之鄉導俟有緩急并力夾攻又立山寨以邀其歸賊不敢犯民賴以安官至朝散大夫性介潔朴儉家居不事華飭龔茂良帥廣日造其廬怪所居湫隘勸康延新之笑曰吾固耐此所業田僅五十畝士林多其清白子洪彥端溪令孫棫郡學正其後裔衣冠至今不替應天府尹錫工部尚書紹儒爲最顯云

馬持國字鯁臣宋南渡入廣因家新會紹興間上策督府張浚幕置之復求去兵部侍郎胡銓見其稟議以爲奇廬州安撫使張希顏因使招集流民上其功借補上州文學攝武鋒軍都統司准備差遣尋召赴

都臺議事執政薦其論列有補得嘉州文學免銓改  
迪功卽淳熙十年果州副都指揮郭棣薦持國能其  
職乞不拘常調有旨再任久之復薦召對陳時務三  
劄稱旨改宣教卽仍與近闕屬官差遣持國欲格和  
議乃著中興自治萬全策愚忠錄繳進之上頗嘉納  
執政周必大揚萬里相謂曰有用才也後以和議未  
格自度恢復不效遂乞外調得廣東鹽幕至則請罷  
白皮鹽場及蠲蠶戶丁錢民便之紹興中通判欽州  
不貿交貨欽人爲立祠改知容州政務寬厚遠民懷

之祠于五賢堂持國力學有大志語及國讎輒泣下  
後竟奉祠歸壽八十餘卒子晞驥最知名

馬晞驥新會人持國長子也弱冠入太學嘗讀書齋  
中不輟帝幸學讀自若帝聞而異之因與平奏擢淳  
熙七年進士第初調安豐六安善決獄時稱明神臺  
府每疑獄必咨焉改知衡山令將行持國問曰汝爲  
衡山則何理頓首謝曰撫字而勤不知其他持國喜  
曰孺子行矣至則寬催科定差役懲預借政務不擾  
先是民利山產茶已沒於豪晞驥務還之民巧賂莫

能奪滿去老穉遞送窮日至有垂涕者比判肇慶雖一硯亦不受焉尋知雷州時持國亦知容州人以爲榮官至朝議大夫卒年五十四子宜祖朝奉大夫知英德府三世六千石矣

曾槐字仲卿番禺人幼能屬文嘗遊周必大楊萬里之門第機亦力學脩行兄弟同舉于鄉金登進士槐初調高要尉以賞改秩知歸善縣郡有豐湖可潤數里爲一方利隄岍圯潰郡委槐脩築不擾而辨郡聞於上命中書籍記與陞擢差遣以親老授本路憲幹

時廣帥張釜合諸司列薦得在內差遣未幾必大萬里力引拔之除監進奏院繼除司農簿兼署太府丞秋有事叻堂攝監察御史時侍郎林采尚書費士寅薦槐可大用將加超擢會與陳自強議論不合力求補外出知桂陽軍槐以郡無城奏請鬻牒爲費久不報乃樽積取給境內不擾郡榷酒錢歲二百三十萬民世苦之捐以便民所積逋錢四千貫連歲追徵槐爲補解及募效用卒五百所費取給于此項安世奏聞擢朝奉大夫無何劾一縣令簞簋不飭與部使者

忤求易地調漢陽軍遂力乞歸視之資刪之不與時  
 俛仰故仕止郡守有省齋集之水續集行于世仲子  
 嘿以承仕即致仕孫肅雍登寶祐丙辰進士授連州  
 推官

鄭漢章南海倫教人今屬順德輕財重義見稱于時宋慶  
 元間為萬安主簿嘗遊蒲澗得遺金二百兩翼日往  
 候亡者還之其人善相地因為漢章葬父至今子孫  
 繁衍科第不絕嘉靖中有進士吳為柳州守歷官中  
 外甚有廉聲蓋其後裔云

崔與之字正子增城人少有奇節遊太學紹熙四年  
 登進士廣士繇太學擢第自與之始授潯州司法叅  
 軍調淮西檢法民窘債負輒有斃其子相誣者僚長  
 欲流之與之曰小民計出倉猝忍令一家轉徙乎况  
 故殺子孫罪徒耳卒從之和糴令下與之獨以時賈  
 糴使民自槩漕使趙希懌多其議令諸邑法焉通判  
 邕州邕守苛刺諸卒衣饜不時給卒變漕司檄與之  
 攝守諸卒帖然密訪首事者誅之擢發遣賓州軍州  
 事轉廣西提刑所至停車裁決獎廉劾貪風采凜然



浮海巡朱厓吏請決諸神與之曰海外諸州官吏久  
恣不法將民害是除寧問神耶朱崖產苦菴民以代  
茗歲賦五百緡瓊織綿為衣所役皆婦人棄稚違老  
有踰年者民病之與之並榜免其他利害多所罷行  
士林彙其事為海上澄清錄嶺海去天萬里貪吏多  
厲民迺疏陳十事高惟肖鑄之名嶺海便民榜召為  
金部員外郎時諸郎多養資望不治事與之鉅細躬  
決猾胥不敢為奸金人遷汴朝廷疑其進迫特進寶  
謨閣權發揚州事安撫淮東寧宗親遣之陳奏選將  
聚兵為邊防首務比至因滁阻山創五砦集義兵守  
之金人犯淮西邊民得依山自固敵疑有伏不敢深  
入揚州兵久不練乃分等教閱步兵首材力騎兵首  
輕捷示以陣法五日一演月試加賞罰焉浙東饑流  
民渡江與之撫納所活萬餘都統劉瑋承密劄取泗  
州兵度淮而後牒報全軍覆沒與之憂憤馳書宰相  
言與之乘鄣五年子育士卒今以萬命喪於一夫之  
手倘敵乘勝入何以待之亟遣精銳使之巡淮旗幟  
迭更往來莫測金人入境宰相三遺與之書令議和

與之曰彼勢方張而遽和必遭屈辱今山砦相望麥  
穀盡刈野無可掠諸軍并力敵能久駐耶於是益脩  
備禦屯兵要害金人深入無功而去和議將成闕兩  
淮制置命兩淮帥臣互相爲援與之力言其非宜議  
遂寢召爲秘書少監軍民遮道泣留與之力辭還鎮  
將度嶺趣召不已行次池口聞金人犯邊乃詣朝奏  
曰臣自外來惟懼外患未息致身內地始憂內治未  
修蓋內外之情不通最今日大患人才進退言路通  
塞國勢安危悉由于此願於用人聽言之際一從公

論詔大臣首清中書之務力爲外禦之圖合謀參酌  
務求至當又言立國之道在謹邊備以壯藩籬安人  
心以固根本兩者蓋相係焉邊徼瘡痍春夏稅役皆  
不可不寬恤也前後累疏數千言擢秘書監兼太子  
侍講權工部侍郎未幾成都帥董居誼以黷貨爲叛  
卒所逐殺總領楊九鼎蜀郡大擾以與之爲煥章閣  
待制知成都兼安撫使陞辭疏曰天下之事必中外  
相應大小相維始有濟焉蓋中外當如一家其勢不  
可不相屬大小當如一體其情不可不相孚臣孤立

萬里外藉令中外勢睽大小情乖或致獲戾臣何足  
惜第事體關係匪輕且聞軍興以來帑庾告竭倘有  
警急束手無策俟請于朝恐無及矣廣科撥以寬民  
力厚積儲以壯邊聲陛下當爲蜀計上嘉納之是時  
金元交攻往來寇掠蜀人驚惶與之至安堵如故安  
丙久握蜀兵每忌蜀帥從東南來者獨推誠相與未  
幾金萬戶呼延棫等以洋洲來歸與之察其誠納之  
獲銳卒千計金人遂不敢窺興元隔遞關盤車嶺皆  
號天險厚賞間諜使覘敵動息邊防益密軍饟告匱

首發成都府錢五十萬緡助糴又慮關外歲糴未廣  
運米三千萬石積沔州備焉初至郡錢僅萬餘後至  
千餘萬金帛稱是蜀知名之士若度正家大酉游似  
李性傳李心傳輩皆薦達之沔帥趙彥呐有時名獨  
察其大言亡當移書宰執謂他日誤事者必此人也  
果如其言與之謝病歸史彌遠以其黨鄭損代之損  
貪黷無能金人大舉入寇與之再臨邊金人始退初  
關外四州和尚原仙人大散二關與之知爲要害嚴  
守之損弃以與敵上流失勢蜀因不守召爲禮部尚

書不拜便道還廣蜀人思之像於仙遊閣並張詠趙  
抃爲三賢祠理宗卽位授寶謨閣直學士知潭州湖  
南安撫使復召爲吏部尚書三辭不就金亡聞朝廷  
議取三京頓足浩歎繼授端明殿學士復辭亡何起  
廣東經略安撫使兼知廣州會廣州摧鋒軍遠戍建  
康四載歸未踰嶺更戍江西數載間每戰皆捷而上  
功幕府不報求撤戍又不獲命遂相率倡亂焚惠州  
長驅至廣州城聲言欲得連帥及幕屬甘心焉與之  
家居肩輿登城叛兵望而羅拜曉以逆順皆釋甲聽  
命首謀者懼獨受禍遂率之奔肇慶自固與之丞拜  
新命卽家治事密遣提刑彭鉉捕之俄而諸軍畢集  
賊力屈請降遂誅其桀黠者餘分隸諸州帝江想彌  
切徵爲叅知政事踰年拜右丞相兼樞密使皆力辭  
乃訪以政事得失人才用舍與之力疾言天生人才  
自足以供一代之用惟辨其君子小人而已忠實而  
有才者上也才雖不高而忠實有守者次也倘謂君  
子無才更求有才者用之意嚮或差名實難別邪正  
消長基於此矣陛下以正人爲迂闊而疑其不勝以

忠言爲矯激而疑其賈直使真德秀洪咨夔魏了翁輩相繼引去而敢諫之士言未脫口斥逐隨之才豈易得而輕棄若此陛下悟已往而圖方來于直言諸臣解職者峻擢補外者召還一轉移力耳陛下收攬大權悉歸獨斷謂之獨斷者必是非利害灼灼胸中而後斷而行之奈何宰相進擬多沮格不行或除命中出而宰相不與知乎夫獨斷而不先兼聽則偏聽之弊必生威令縱上行權柄終旁落亂之階也時戚畹內侍相倚爲奸復深言其弊帝嘉歎趣召愈力控

辭三疏嘉熙三年始獲致仕以觀文殿大學士提舉洞霄宮謝事還里所得祠祿未賜悉辭不受或問之曰仕而食祿猶懼素餐今已退逸可復貪君賜乎聞者歎服平生俸餘皆均宗黨連帥部使者日候其門歲僅再見未嘗談及外事嘉熙己亥十一月薨年八十有二遺表言事有萬變而隱乎微人惟一心而攻者衆出而大小忠良之臣箴規之日少入而左右佞倖之徒承順之時多倘戒謹之志稍衰則清明之躬易怠蓋天下以身爲本唯聖人以禮自防毋不敬則

內敬恒存思無邪則外邪難入大書自警久而有功此檢身之要也表入上震悼贈少師謚清獻薨前數月書曰東南民力竭矣諸賢寬得一分民受一分之賜蓋絕筆也嘗述劉臯語爲座右銘曰無以嗜慾殺身無以貨財殺子孫無以政事殺民無以學術殺天下後世歷仕四十七年未嘗一玷彈墨去蜀日四路饋贐一無所受子叔納婦有奩田六百石責令歸之遺命子孫不許求官階其恬然無欲蓋天性也家範嚴肅親族莫敢狐假者其姊嘗爲子求官曰此豈私贈物耶竟不予邑子吳仁孫初第之官求先容正色曰君子當以勳庸自見何患人不知乎廉其清謹密荐之嘗築菊坡以自適後李昉英侍講經筵理宗詢及嘉歎久之大書菊坡二字賜其家論者謂其屹然大臣風節與張九齡齊軌其白麻不起則千載一人云廣帥方大琮肖像與九齡祀于學名二獻祠吳英南海人資幹魁梧有謀略嘉泰四年海寇竊發有司募人捕之英往應命乃設復要害出其不意擒獲無筭帥府上其功特授承信郎開禧二年有邊警

調發守把漢川防扼江面虜陡至英請於主將自往  
偵之英服漁人衣操小舟往來洲渚間虜不疑也游  
騎覺之手刃一人而還因得其虛實由是益知名嘉  
定十年除平江府駐劄御前都副統制歷轉武德郎  
淮上却敵多建奇績寶慶改元賜御筆獎之轉武議  
大夫拜團練使英捧詔感奮淮口之役躬冒矢石爲  
衆隊先乘風縱火焚虜舟五百餘艘虜大奔斬首千  
餘級尋戰于北神鎮又縱火燒斷橫江鎖虜引去及  
虜圍鹽城親率舟師登岸死戰連獲大捷累功轉左

武大夫防禦使卒于家年八十有四英爲人智勇愛  
養士卒不吝醲賞故能得其死力所居有功平生有  
馳騁伊吾之志每聞和議成輒眠食不安者累日其  
忠憤類此子三人長宗道武功大夫知賓州次宗達  
武功大夫知循州次宗遇累官脩武郎

楊汪中字季子番禺人幼孤篤志好學廣師楊長孺  
見其文重之辟爲州學錄嘉定己卯領鄉薦尋登進  
士第調靖江民曹桂帥以瓊莞機宜辟之平叛弭變  
風裁凜然端平中改肇慶府推官家居摧鋒戍卒于

紀書簿城民大恐汪中繼城諭賊及崔與之判本郡汪中攝帥幕密佐靖亂尋移廣右市馬之役邕蠻帖服無何擢知廬陵勸雜濟邊區畫有法改知歸善功業不竟人多惜之

溫若春番禺人少力學能文專親以孝聞淳熙十三年領鄉薦累計偕不第歷三十五年志不少衰嘉定中廷對特奏名第一人賜進士出身兩調潼川英德學官教有模範寶慶間除樞密院架閣紹定二年遷太學學正文譽焯焯動諸縉紳間召試館職秘書省

正字尋轉校書郎夙與崔與之遊與之素重其學行思薦達之紹定三年上詢與之南中人才對曰吳純臣有監司之才溫若春宜清要之任於是除若春秘書郎若春博洽古今同列推服無何與之帥維揚握手道生平曰人之功名晚節爲難若春唯唯遂力請掛冠以朝奉即致仕家居節儉壽八十餘卒淳祐甲辰廣帥方大琮立四先生祠祀古成之李昉英郭闔暨若春云其裔孫舊聞嘉靖中為學正以志節稱梁文奎東莞人博學強記為文尚理致開禧元年廷



對幾中首選時樸侂冑當國以策語切直故爲所排  
易直乙科第一性不喜干人歷左藏十餘年不調處  
之自如同邑有梁詠者亦長於記問世號書筭登嘉  
定進士歷醴陵縣令欽州通判所至皆有德政其博  
雅與文奎齊名

李昂英字俊明番禺人父天棊龍圖待制母黎氏夢  
大星降庭而生昂英少雋穎一覽成誦文思絕人弱  
冠以春秋首解崔與之深器重焉寶慶丙戌進士第  
三人授汀州推官郡守陳孝嚴鷲悍暴靈部卒構亂

昂英討平之以母憂去起武學博士未赴會摧鋒卒  
叛攻廣州承平日久人不知兵闔郡大震帥守曾治  
鳳輩航海潛去使黃歲請于崔與之爲守禦計與  
之令昂英偕楊汪中縮城下諭賊退擢大理司立轉  
太學博士賜對奏劄語多剴切上賜金旌之累遷大  
宗丞權兵部郎中以親老求外補除直秘閣福建提  
舉甫下車貪吏望風解印去歲大侵捐俸賑貸所活  
萬計崔與之卒請歸持心喪不許尋以父憂去既葬  
築室墓左與宗姓子弟講業其中累召不起淳祐初

以吏部郎召會丞相杜範侍御劉漢弼祭酒徐元杰相繼暴卒人皆疑史嵩之所爲廷臣莫敢言昂英獨請正嵩之罪復陳三事曰定國本曰去奸權曰斥闈寺上嘉其直書名御屏尋擢右正言上謂宰相曰李昂英南人無黨中外頗憚之除兼侍講益感知遇知無不言會史嵩之服闋謀再起昂英奏嵩之罪浮四凶當遠竄荒裔不報率同列抗疏亦不報於是復自疏曰臣疏列嵩之奸狀踰旬不報陛下下則曰保全大臣二則曰保全臣第嵩之包藏禍心乃誤國巨

姦賊民巨蠹何足置人心乎上爲動容乃策免嵩之時執政陳韓剛很京尹趙與憲暴斂金奏劾之上却其疏昂英引上裾跪奏上怒拂衣入留疏御榻再拜而退命與外補三學諸生餞諸國門外歸之日父老爭持彩幟郊迎焉三除外秩皆不赴會權廣帥丘迪請淫刑以逞戮及無辜移書請覈之不從而暴益甚昂英繳告勅留郡庫乞辯平民之寃於是全活者數百人竟以此落閣職淳祐壬子徐清叟薦起直寶謨閣江西提刑兼知贛州慨然以洗寃澤物爲已任糾貪墨

決寬滯一道肅然郡人崇像祠之擢直寶文閣尋徵  
爲大宗正卿兼國史編脩實錄院檢討時賈似道丁  
大全用事首疏論之上有西太一之幸復諫曰胡虜  
方強四郊多壘卧薪嘗膽此其時也湖上遊觀路途  
迢遞回輦必暮意外可虞上嘉納焉尋擢龍圖閣待  
制吏部侍郎封番禺開國男屬內侍董宋臣輩竊弄  
威福御史洪天錫疏攻之俄解言職昂英乞與俱貶  
留䟽拜辭歸隱文溪之上久之召爲端明殿學士僉  
樞密院事辭不赴上嘗賜其所居額曰久遠曰文溪

曰嚮陽堂丁巳秋忽一夕大星隕舍東闔城駭觀

日昴英卒年五十有七謚忠簡昂英天性勁直議論  
高邁其文簡而婉一時同館名流如江萬里文天祥  
皆推服之平居接物寬而有容至于臨大節處大難  
毅然不可奪所著有文溪存稿二十卷行於世廣州  
南江中有海珠山昴英讀書其上後人因祀焉有司  
復祠于城中

陳應辰東莞人領嘉定己卯鄉荐爲人謙和舉動不  
妄少從師獨處一室讀書夜半忽有隣女越垣潛至

廣東通志 卷之三十三 五十七 五世  
應辰呼蒼頭明燈兀坐鄰女慚退黎明卽遷他所兩  
領嘉定貢舉恩授南恩司法將之官適廣帥方大琮  
舉行鄉飲請充大賓次年再請以一時齒德無踰應  
辰其見重如此再任龍川丞改連州推官兼權僉判  
時綱運積歲額缺官吏每預索於民民甚苦之應辰  
以已俸補宿逋綱運遂得如故而民不擾連守陳中  
孚嘉其績聞于朝遷通直郎致仕年八十餘卒  
錢益東莞人登淳祐元年進士性剛介不可干以私  
執親喪三年居廬足跡不至寢室既禫當免解赴省

或曰至試期應除服益曰舍喪次而行不離步也乃  
遲三年赴省中第歷廉州鹽官在任五年所得額外  
常費皆以補綱運經畫鹽局事宜不擾而辦鹽司聞  
于朝再調靜江府僉判適己未幹復之變府閉城門  
官多遯去徑赴任謁靖江帥李曾伯曰吾儕食君祿  
可先去爲民望乎曾伯甚義之薦改贛州興國縣時  
峒寇連年剽掠邑境益至卽請兵躬往剿捕掃其巢  
穴民賴以安相與立碑記其功德

郭闡字開先番禺人三預計偕衰然爲舉首柳南廬

廣東通志 卷之三十三 三十一  
方春柄文衡得其文驚異之登淳祐甲辰進士授真  
陽尉調鬱林學官擢知高要縣有政聲秩滿授梅州  
僉判改秩宰平江尋擢監察御史知無不言糾正奸  
邪不避權要其所彈擊公論莫不稱焉初廣州置買  
銀場本與商舟爲市後從而征之歲久弊滋吏緣爲  
奸征民不勝苦又提舉塩司以塩科配民戶價多而  
塩少深山窮谷重罹其害聞以狀聞罷之百姓大悅  
汀贛壯丁往來潮惠循梅境以取鬻爲事紹定間公  
征權激變合江閩兵乃免靖亂遂詔免權四州塩繼

又權之悍民遂相率爲盜閭復奏罷且請選廉恕以  
宣德意斥貪繆以蘇瘡痍遷右正言首陳納諫之道  
以廣上心因言士大夫奔競成習營求薦引無所不  
至至於寬縱盜賊殘害良善者比比皆然復言今天  
下之患莫甚於上下不相應選帥闔校偏裨旌死節  
誠方今急務而應令者率文具緩急難恃乞選朝臣  
出使審核虛實庶幾募兵督餉不敢爲欺時禁迂臣  
預兵事間乃言臣當言路天下事皆當預聞况邊務  
尤最大者於是兵糧額數皆關白諫院聞自官臺諫

後悉心憂國形神日瘁循至病革所言皆軍國大事  
不少及私卒年六十六闔素清絜家無餘財屬纊之  
日幾無以歛上嗟悼贈恤特厚廣人德之以間配享  
崔清獻祠

李用字叔大東莞人少孤事母雖盛暑侍未嘗去巾  
襪德器凝重造次必以規矩初業科舉及讀周程諸  
書即棄之杜門潛心理學非親友婚祭不出如是者  
將三十年而踐履日益熟士從學者無虛日爲時名  
儒人因稱曰竹隱先生李昂英聞其賢就見與語終

日用未嘗有懈容昂英出語人曰吾今乃見有道君  
子嘗著論語解究明伊洛奧旨以溯洙泗之源學者  
傳習之昂英進其書于朝詔授校書郎用曰著書豈  
爲干祿計哉不受而歸又遷承務郎以旌其高安貧  
樂道無求於世其誨生徒貌肅色和豐豐有序人樂  
從之故多造就卒年八十一所著論語解傳于世廣  
東提刑周梅叟奏于理宗御書竹隱精舍額賜之咸  
淳中廣東提刑錙叔子命祠于邑學子三人各通一  
經能世其業長春叟最知名得朋官法曹松叟有文

章聲

春叟字子先東莞人少穎悟邑宰許巨川見而異之  
 勉其遠遊從師遂謁陸鵬升授春秋寶祐丙辰省試  
 中選以小誤黜已未試入選厄於數竟為易置廷議  
 惜之交薦入仕授惠州司戶有賢能聲景定間廣東  
 提刑楊允恭薦之疏曰臣念嶺海素號多賢自清獻  
 與起比年恬退清修之士蓋多有之據臣所聞迪功  
 郎李春叟刻苦窮經清嚴律已兩試南省俱中前列  
 厄於權要之私竟就特奏春叟處之怡然間嘗攝職  
 則確守公廉及其退居則安貧授徒未嘗汲汲於仕  
 祿可謂經明行修者倘蒙朝廷特  
 賜獎拔以厲浮競之俗世道幸甚除肇慶府司理

辨冤獄當路不從即投告身請歸事竟白郡守劉叔  
 子嘆服遷德慶教授滿歸無意於仕上書直指郭閻  
 力言銀場之害鹽局之弊疏奏罷之暇日著論語傳  
 說以補先志所未及大抵撮朱子要語為之又摘其  
 玄微者為詩使學者詠諷自得名曰詠歸集家居以  
 經學訓後生嶺海名士多出其門朝廷聞其名除軍  
 器大監辭不就宋末邑人熊飛勤王潰歸駐兵于邑  
 時邑士民多逃竄飛揭榜限三日回家否則發兵戮  
 之春叟哭諫飛乃止時羣雄四起乘時剽掠以春叟

故多不忍犯邑人賴安至元丁丑元兵至廣欲遣兵  
勦東莞春叟扁舟往謁其帥以死爭事遂已邑人德  
之繪像祀焉年八十卒諸子多文藝可觀

趙必瑒字玉淵東莞人系出濮邸咸淳元年與父崇  
訥同登進士時稱喬梓聯輝簪紳侈爲盛事崇訥性  
恬淡任南安軍司叅軍卓著賢聲尋曰父子竊祿是  
取盈于造物也解歸必瑒初任高要簿尉郡檄署四  
會縣有異政民爲立祠再任高康丞棄官歸養惠州  
守文璧辟爲郡從事璧兄丞相天祥集兵勤王必瑒

往謁相與論時事慷慨泣下天祥重之後察璧無堅  
守意卽歸適熊飛駐兵于邑欲盡括稅戶財穀充軍  
費人情洶洶必瑒恐爲變請于飛願以家資三千緡  
米五百石贍軍免百姓苦擾飛從之卽以必瑒董其  
事必瑒隨其家各寬征之人感其義復語飛曰聞王  
師駐海上欲遣趙潛方興安撫東廣莫若用宋號通  
趙方二使尊宋主然後舉兵事成則可興復不成亦  
足垂弗朽飛然之卽日署宋旗號舉兵向城遂迎潛  
興入廣時天祥開督府于潮惠辟必瑒以僉書軍事



判官兼知錄事相與殫謀恢復而勢已不支矣宋亡  
 隱于温塘足跡不入城郭一時隱者多就之至元甲  
 午卒必塚為人才識俊邁多慷慨仗大義樂周人之  
 急所歷郡邑著循良聲有覆瓿集行于世今祀鄉賢  
 弘治中進士璧者歷副使有能聲蓋其後云

翟龕東莞人父景先登淳祐進士官僉判世有行誼  
 龕性孝友海寇猝至躬負親走山麓間榛險不避嘗  
 割田供太宗祀事與族人共之景定二年以書經領  
 鄉薦咸淳二年再舉都魁官本邑主簿宋末元兵壓

境人民逃潰熊飛欲盡括稅戶佐儲胥龕愍然曰天

未厭禍口後奈何更之以瘦力諫止捐貲倡助

軍費以之下呵元兵所過恣屠戮羣情駭愕龕與

李春亦必張元吉帝謀決策竭力完守綏輯撫

循之杜門不出杜曰聚秀延士講集其間

卒祀鄉賢祠

張元吉東莞人系山九旱之祖淑篤于行夜出聞

窮簷嘆息聲即委令戶下而去不令知焉父光濟漕

舉進士元吉當宋末之邑尉元使招討使黃世雄梁

雄飛入廣邑丞呂立遣元吉以邑氣附世雄委元吉攝尉既而宋制置使趙潛舉義元吉即往從潛使之同熊飛守南雄州飛戰死于韶元吉歸仍攝尉後元張弘範率兵自惠陽至邑人驚遁元吉使其弟登辰罄家資往賂之登辰亦有知略咸淳癸酉舉于鄉見時事日非勸邑宰爲保護鄉井計至是抵元軍爲一邑請命邑獲安堵後攝邑丞帥府欲增東莞公 繁應辰力諍乃止子惟寅有才名元初上採珠不便狀遂罷採至今人德之

陳庚字南金東莞人父監新博通群書邃于理學補貢不就隱居東湖之上庚擢咸淳甲子鄉貢進士南省罷歸無復求仕志日肆方古文詞沉蔚有致經畧使劉寔奇其才辟置幕府無何以世亂歸棲東湖研心性命之學學者翕然宗之牙紀領咸淳九年鄉薦宋季與庚皆退隱于家卜 必瑒相與賦咏自娛尤工小詞有周美成康伯可遺風所著有越吟斐稿行于世

劉哀然番禺人幼英穎性端謹同邑梁惟中善品藻

見而嘆異曰是必以一頃頃以女弟妻之咸淳四年登進士等筮仕州判官考最進承直郎差提領豐儲倉所檢察官恭帝即位諭銓部曰史館經筵之屬本無定員然其選最重比來選頗雜而史局遂輕宜擇文學清敏者入充史局德祐二年春哀然遂改史館檢閱尋進承議郎行太常丞兼翰林權直時元人入寇國瀕公亡在外則牧守叛降在朝則百官奔散帝憐之能止哀然守死不去降勅褒美特授朝奉郎其忠無何以憂憤卒于行在聞者

悼之其子孫析居從化者至今仕宦不絕審理格檢討克正皆其後云

王道夫番禺人少從陳大震遊苦志力學登陳文龍榜進士咸淳中仕連山尉有保民驅寇功度宗寵以御札有金注碗盤之賜由是以才略知名張鎮孫敗後凌震得脫收集散亡數千倚文天祥諸軍爲聲援時大震道夫皆家居端宗召大震爲尚書吏部侍郎道夫權兵部侍郎兼轉運判官大震固辭不就道夫拜命與凌震各將兵相爲犄角景炎二年三月文天

廣東通志 卷之三十三  
祥復惠州道夫與震謀曰文公既克復疆土吾等乘此聲勢可大舉成功機不可失震從之時呂師夔退兵震與道夫帥師擣其虛遂復廣州詔褒諭之以震爲廣東制置使道夫直拜兵部侍郎廣東轉運使是年四月端宗崩衛王即位改元祥興加道夫學士兼兵部尚書十月元將李恒襲廣州力戰不利閏十一月庚戌道夫遁壬戌震遁癸亥元人復陷廣州獲船三百艘禽將吏宋邁以下二百人以去於是二人會兵圖再舉十二月壬午道夫引兵先往取廣州與李

恒兵戰大敗被執凌震繼至亦敗退于城東菱塘又敗明年二月李恒與張弘範合攻厓山震降宋亡之後道夫不仕元憤恙而卒其子孫世有登鄉薦者卒食其報云

陳大震字希聲番禺人寶祐癸丑進士釋褐爲博羅主簿遷循州長樂令以敏捷寬厚稱轉廣濟令以平盜功改奉議郎叅靜江帥府咸淳七年權知雷州慮西湖湮廢乃大築堤岍建平湖書院以祀寇準及蘇軾兄弟有婦人與夫殺養母僞以盜訴大震怪其詞

廣通志 卷之三十一  
色廉之果非盜一訊具服人以爲神理郡二年所剖  
決無冤獄轉朝奉大夫知全州元兵壓境知力不支  
自劾罷歸端宗入廣召爲吏部侍郎不就宋亡元錄  
遺臣授司農卿廣東儒學提舉以疾力辭君嘗立靈  
位以待死與素所往來者飲酒賦詩曰吾可以下見  
穆陵矣卒年八十大震爲人剛方嚴毅平生無戲言  
御子孫不冠不見所爲文典雅有集行于世

張鎮孫字鼎卿南海人少苦心讀書以博學強記聞  
咸淳辛未舉進士廷對爲天下第一先是童謠曰河  
南人見面廣州狀元見有司因構見面亭以俟之李  
昴英未達時讀書海珠以大魁自期嘗與同志數人  
結龍頭會有夢鸞長弓射江江爲竭者昴英占之曰  
應是識者其張氏子乎至是果爲狀元其年大江忽  
竭往來相望人始悟見面之說其所對制策有曰帝  
王之治天下自積一念之仁始帝王之仁天下自積  
一念之敬始又曰臣竊觀聖心或者未能積其敬也  
夫主一之謂敬無適之謂一今也恐懼於旱潦炎寒  
之警固知敬矣悅懌於瑞芝之觀何所積之未純耶

齋莊於圭璧薦享之時固知敬矣轉移於霞光迎導之際何所積之有間耶時度宗留意機祥所言觀瑞芝迎霞光實事也皆人所難言臚唱日天陰晦大雨如注識者謂非文明之兆舊制狀元宣拜後中官催索謝恩詩宮女倚機以俟詩成即織諸錦以進鎮孫素不工詩是日運毫如飛人謂名成才湧授秘書監正字遷校書郎尋通判婺州迎養其父母德祐元年元兵至鎮孫遂奉二親歸廣臺章劾之詔罷鎮孫職端宗航海幸閩廣間廣州海上潰軍奉鎮孫爲帥鎮

孫與都統凌震結集行伍分東西二路誓圖恢復景炎元年十二月帝舟次于惠州之甲子門詔以鎮孫爲龍圖閣待制廣東制置使兼經略安撫使委以軍事將校盧震擁衆暴橫鎮孫數其罪戮之由是將士用命兵威稍震元首帥呂師夔張榮實已入廣州聞鎮孫至以軍餉不繼退走命其將梁雄飛守之二年四月帝舟次于廣之官富場鎮孫復廣州雄飛等走韶州下詔褒賞親知多啓賀鎮孫有憂色皆不荅十一月元酋右丞塔出會師夔合攻廣州鎮孫欲爲守

禦計而力不支城陷明年二月師夔還師執鎮孫北歸死于大庾文天祥作詩悼之時陳仲微者紀海上事書鎮孫死節董師謙亦云鎮孫死難惜無有暴白之者而史臣以降書母亦董狐責盾之義乎

石文光增城人少以知勇稱宋景炎丙子元兵下廣二王航海丁丑十二月舟次謝女峽命丞相陳宜中往占城借兵時文光從行密察宜中無還意遂率所部兵船數十艘回廣時群盜並起互相剽掠文光脩築營寨集兵備禦民乃獲安既歿邑人懷其捍禦之功立廟祠焉因號石神廟

李肖龍字叔膺增城人登宋咸淳進士調贛州司戶改循州興寧簿攝長樂事縣多豪強小民受侵相率爲盜於是首嚴其罰立團堡法使鄉民各自爲兵故人多相識無敢爲盜者又禁邪巫正婚姻興學校課農桑四境晏然累遷朝請大夫致仕後邑令欲倍賦于民肖龍力爭仍舊邑人德之肖龍賦性剛急製漆牌繫肘以自警嘗撰易傳編五教書傳于世

元盧宗文增城人至順間以儒士舉授南雄路始興

縣尹清謹自持士民頌德改廣州路推官卒

周脩字望舒新會人博通經史邑令賢之辟爲邑訓導脩性剛直疾惡嚴元季民多效逆雖士黨有之脩面折人過或讓以書多切直賊帥黃斌見而大怒劫致之時門士欲爲營解脩不可曰吾有命也屈辱於暴人無益及擁至賊前閉目不視大叱曰大蕘罵不絕口遂遇害時太常卿余觀國持節江南聞之以爲義士云論者曰惜也在明哲保身之章則善矣民之多辟毋自立辟脩亦自立辟也夫

今天澤從化人大德間進士任新州總管府通判性至孝操履清潔居官寬而能察威以濟惠盜賊聞其名不敢入新州界在事六載掛冠而歸新民思焉羅蒙正字希呂其先廬陵人父稽叔游學至新會因家焉蒙正幼穎強學從肇慶羅斗明學詩遂以詩名邑中縣令沈壽開古岡書院禮之承學者傾一時矣尋檄爲高州學正秩滿歸避地郡城憲吏趙式薦授南恩州教授州判吳元良素聞其名相見甚歡時元良有意割據一方欲倚爲圖畫蒙正心知其意因以



詩謝之亡何卒元良收葬焉

*[Faint vertical text, likely bleed-through or a secondary column]*

*[Faint vertical text]*

*[Faint vertical text]*

*[Faint vertical text]*

*[Faint vertical text]*





